

2 NWER NYI POL NYONO TV ANEB ERO BA LI GO TESALONAIKA

¹ Me Pol, a Silvanus, go Timoti, e kp'nyono nwer nyia tv aneb ero ba li go Tesalonaika, bo ji li ka Esowo Nsoo ejahre, a Jisos Kraist Ntul ewahre.

² Nong, Esowo Nsoo, a Jisos Kraist Ntul ewahre ka-n nnoobo, a elkoono.

Eltim ni Pol jo kak aneb Esowo ngare nyi bo jo nyehn erem

³ E bahke tiki jo ka Esowo saam ano ano, abonanee, tib wahn. F'fuumu re wahr lim ano, tibre ekakesehk ejahne kp'gbale na, fere b'budu. Elgoro enahne ni n kp'goro atemtem kp'tob gbal na budu fvfo.*

⁴ Owo wahnge e kpo wor nnyo kun-n goji aneb Esowo ba li go aro nyako. Tibre wahn ebsoro asi go ekakesehk, fere kp'kpuumu, jol eji bo kp-n gb'gbak, fere jo kak-n erem.†

⁵ Jia ji kp'tibi etingitingi elam ji Esowo, ye jio ji bahke limi, ejahbetul eje fuumu a nahne, ji wahnge no n kpi erem nyehn.‡

⁶ Esowo bahke lame elam ni nno, fere bongo ane ba kp-n erem kak, fere tob kak bo erem fvfo.§

⁷ Á bahk-n kake erekekv, wahn jia ji kpi erem nyehn anv, a wahr fvfo, ngare nyio nyi Ntul a

* **1:3 1:3** 1 Tes 1:2-3 † **1:4 1:4** 1 Tes 3:2-7 ‡ **1:5 1:5** Luk 21:36

§ **1:6 1:6** Ell 18:6-7

Jisos bahke lohngo go ejahbetul Esowo ba, a aj'jok enjel enye.

⁸ Á bahke koko agun nya kp'lulu ba a nya, ba kak ane ba ki nyi Esowo erem, a ane ba kil wuku nnoobo etib bio bi Jisos Kraist Ntul ewahre.

⁹ Bo bahke nyehne erem bio bi elranngge go njinanjini, bi bo bahke yabe bo a Jehova. Bo nehm tiki yiimi go ege esamahr, fere bel egburu ellub ene.*

¹⁰ Nsol nyio bahke limi efung bi á bahke bake ellub ko goji ane ebe. Ane kpee ba ma taame tv-e, bahke kpoko bo esi, bo l'nyehn-e. Wahn fvfo, n bahke tob woomo go bo ellong, tibre etib ebahre bi e tiing-n no bade efung bio, n t'taame.

¹¹ Ana wo e kpo kono ero kak ngare anyehng anyehng ka-n, eji Esowo l'lim-n, n fuumu go elkpin ni á yehk-n no re wahn jol. Nong, Esowo gohr-n lim go ege a nsahm, eji n l'lohko lim nnooba ntoobo anyehng anyehng nyi n toobo no, fere lim eltum enahne ni n kp'limi go ekakesehk tete gohro mal,

¹² eji mbing nyi Jisos Ntul ewahre l'bel ellub go egahne, wahn tob bel ellub ene tib go nnoobo nyi Esowo ebahre, a nyi Ntul a Jisos Kraist kpo ka.

2

Ebinne jio

¹ Bade elbake ni Jisos Kraist, Ntul ewahre bahke bake, ana e bahke song kpir-e, fere jol a ne edi ajehng, n kp-n gboongo abonanee re,

* **1:9 1:9** Ell 20:14-15

² eltim k'jo gul-n eljoobo. Kana jo fahl, jol eji ane bandiki kp'b'bung re, efung bi Ntul ewahre bahke bake ebrehng. Fundiki nne nyehne amahr, fundiki nne bungu na tong-n, fundiki nne nyono na go nwer re, wahr ba kp'tibi elkohn eltibi ana nio.

³ Kana taame, nne awohng awohng nehm-n go mbang anyehng anyehng. Tibre etingitingi, efung bio nehm rehng, sehngem re no, ane tohko ten Esowo,* nne abiafem noo kehm lohngo ba, ye jio ji bahke jeke go ellulagun.†

⁴ Á bahke jo ten ejum ajehng ajehng ji li ka Esowo, a ji ane kpo kak. Á bahke jehke go etahk Esowo, fere jo rod elne bum wahre wahre, are ye Esowo bi.‡

⁵ Ń nehme kpe buumu re, eji n jolo a nahne o, n tong-n tong nsol nyiaa?

⁶ Ń kp'kahne ejum ji kp-e kpane,§ ji wahnge á l'k'waka ba tete ngare enye biingi.

⁷ Ab'bi nyao nya li mbehr mbehr, nya nya ma kehme eblohngo a. Jol ab'bi nyao nehm tiki lohng, jol gbul gbul gbuul, tete bo fak nne noo no kp'kpane.*

⁸ Owo nne abiafem noo bahke kehm lohngo ba. Ntul a Jisos bahk-e wulu go elfeb ni á bahke fahle go ege a nnyo, fere ranng-e go elbake ni á bahke bake.†

⁹ Nne abiafem noo bahke bake go nsahm nyi nnehm, ba lim ajoobo akpokosi, fere jo lim awak.‡

* 2:3 2:3 2 Tim 3:2 † 2:3 2:3 Ell 13:1-8 ‡ 2:4 2:4 Mat 24:15

§ 2:6 2:6 1 Tes 4:17 * 2:7 2:7 Ell 7:9 † 2:8 2:8 Ell 19:15,20

‡ 2:9 2:9 Ell 13:11-13

¹⁰ Á bahke koko ab'bi anyehng anyehng, jo nehm ane ba bahke kpoko tan. Tibre ane bao, etingitingi nehm jo kor bo. Bo bahke tene etingitingi ji kehn jol tahre bo.Š

¹¹ Esi jio ji wahnge Esowo bahke tumu etohko ji nnehm tv bo re ba lim bo, bo taame tv nsol nyi li afahnge,

¹² eji ane bao kpee l'li ebi, bo jio ji ki taame tv etingitingi, abiafem jo kor bo go ellimi.

Ane ba Esowo yehke bo re bo bel eltahre

¹³ E bahke tiki jo kak Esowo saam tib wahn abonanee, wahn ji kpo kor Jehova, tibre Esowo yehk-n go mbomannahb re wahn bel eltahre go nsahm Etingi Etohko, nyi kpo lim re wahn jol ejahne ejahne, eji n kp'taame tv etingitingi.

¹⁴ Esowo yehk-n re wahn jol ana, eji n l'bel ellub ni Jisos Kraist Ntul ewahre, tib go nnoobo etib ebahre bi e jo tiing-n.

¹⁵ Abonanee, owo nobo re wahn yiimi ano t'tahne, k'tiki yake eljini nio ni e tib-n no, jol afi e nyono go nwer, afi e fere bungu na go nnyo.

¹⁶ Jisos Kraist Ntul ewahre antahng antahng, a Esowo Nsoo ejahre no wahr kpo kor-e, ye jio ji ka-r alum nya ekakeltim nya li go njinanjini, fere ka-r ekunukpu ji nno tib go ege a nnoobo,

¹⁷ nong, bo jo kak-n eltim, fere lim-n, wahn tahne, eji n l'mal jo lim ejum ajehng ajehng ji kp'nobo, afi jolo elbungu, afi fere jolo eltum.

3

Jo kaken ero ka-r

¹ Abonanee, jo kaken ero ka-r, eji alum Esowo l'gulu elyeere, fere bel ellub, ana tob jol go egahne fvfo.*

² Tob jo kaken ero fvfo, eji Esowo l'tahr-r yehke go abo nya abi ane. Tibre ane kpee sang kp'taame tv alum Esowo.†

³ Jehova li nkakesehk a nne, á bahk-n limi, n tahne, fere baab-n, eji Ebinne jio l'ki-n ma lak abo.

⁴ Jehova ma-r lim re wahr jo bum-n go etin-gitingi, tibre n kp'limi nsol nyi e tong-n no, m bahke tiki jo lim nsol nyio ano ano.‡

⁵ Nong, Jehova lennge ntim enyahne, goji n l'kahn elkoro ni Esowo, fere kahn elkpuumu ana ni Kraist kpuumu no.

Ana nne Esowo bahke tiki jo lim eltum

⁶ Abonanee, e kp-n tongo go mbing nyi Jisos Kraist Ntul ewahre re wahn jo yab mmonanne ejahne awohng awohng no kpo lim eljini ni kil nobo, ni ki li eljini ni e tib-n no.§

⁷ Wahnfono antahng kp'kahne mbang ana nyi m bahk-r toono. Tibre e belem eljini ni ki nob ngare nyi e jolo a nahne.

⁸ E tikem ko nsol alehke nyi nne awohng awohng, k'ka ekun. E jo bade sehng, jo lim eltum atv a njul, eji e l'k'jo tokko nne awohng awohng.*

⁹ Eji e jo lim ano, lohngem re, nsahm e kpimm nyi e bahke ma ko nsol alehke go egahne. E jo

* 3:1 3:1 Kol 4:3 † 3:2 3:2 Elt 17:4-5 ‡ 3:4 3:4 2 Kor 7:16; Gal 5:10 § 3:6 3:6 Mat 18:15-17; Rom 16:17 * 3:8 3:8 Elt 20:34-35

limi ano, tib eji n l'kahn mbang nyi rn bahke jo toono.[†]

¹⁰ Ngare nyio nyi e jolo a nahne, owo e tong-n no re, "Nne awohng awohng no tohko jo lim eltum, á k'jo li nsol alehke."

¹¹ Tibre wahr ebwuk re, egom ejahne jindiki kpehme lim eljini ni nno. Bo kpehme lim eltum sehngem nnyo mi bo kpo kak go afem ane.

¹² E kp'tongo elkohn ane bao, fere jo rehke bo go mbing nyi Ntul a Jisos Kraist re, bo bel elkpín ni nno, fere jo lim eltum, jo le elbo.[‡]

¹³ Abonanee, nong, nnoobo alimi ki-n kpen. §

¹⁴ Nne awohng awohng no l'ten elbumu alum nya e nyono go nwer nya, nyonen mbing enye kak go nwer, wahn k'kpe jo jen a ne, eji ndon l'file.*

¹⁵ Kana ye jo rod bum ana nnekv. Nobo na re wahn jo rehke-e ana mmonanne ejahne.

¹⁶ Nong, Jehova bi elkoono jo ka-n elkoono ene ngare anyehng anyehng go mbang anyehng anyehng. Nong, Jehova jol a nahne wahn ane kpee.

¹⁷ Me Pol wo kp'nyono nnyo akake mia. Ana wo n kpo kak elliingi go nwer anyehng anyehng nyi n l'nyon. Mbang nya nyi n kpo kono elnyono re,

¹⁸ Nong, nnoobo nyi Jisos Kraist Ntul ewahre jol a nahne wahn ane kpee.

[†] **3:9 3:9** 1 Kor 9:14-15 [‡] **3:12 3:12** 1 Tes 4:11-12 § **3:13 3:13**
Gal 6:9 * **3:14 3:14** 1 Kor 5:9-11

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4